

TEZAU LITURGIC

3 MAI

SLUJBA SF. CUVIOASE IULIANA ȘI EUPRAXIA DE LA MOSCOVA



MOSCOVA, 2000



**Мая в 3-й день
Служба преподобным
Иулиании и Евпраксии
Московским**

НА ВЕЛИЦЕЙ ВЕЧЕРНИ

На Господи, возвах: **стихиры на 8, глас 5:**

Подобен: Радуйся, Живоносный Кресте:

Приидите, благовернии людие, / светло
празднуим торжество Церковное / во Обители
преславныя Зачатиевския, / в песнях
возвеличим наставниц премудрых, /
преподобных Иулианию и Евпраксию, / теплых
предстательниц наших пред Господем, / и с
любовию вопием к ним: / Христа Бога усердно
молите / / низпослати душам нашим велию
милость.

Мироносицы земли Российстей, / сестры бысть
по плоти Святителя Алексия, / уневестившиися
Христу Богу, / преподобнии Иулиания и
Евпраксия, / умудри Господь вас множим быти
во спасение, / и собранием дев непорочных
множества / вслед Пречистыя Богородицы / во
обители Царя Небеснаго хожду, / Емуже
непрестанно молитесь / / даровати нам велию
милость.

Срадуйтесь нам вся верных множества:/ велий град Москва и вся Россие православная./ Днесь немолчными гласы воспеваем/ светоносную и пресветлую память/ Иулиании матери нашей преподобной,/ с неюже и сестры ея Евпраксии,/ поклоняся прославльшему вас/ Христу Богу Иисусу Сладчайшему, // дарующему нам мир и велию милость.

Наста бо светлый день празднества,/ красуется ныне Церковь с вопиющими:/ радуйтесь, предивнии угодницы Божии, преподобная матери наша Иулиания/ и Евпраксия блаженная,/ к лицезрению красоты Небесныя возшедшии./ Мы же во умилении припадаем/ с верою к многоцелебным мощем вашим,/ в нихже, чудеса удивляема, // дарова Господь нам велию милость.

Ины стихиры, глас 8.

Подобен: О, преславнаго чудесе:

О, предивнии наставницы,/ Иулиания преблаженная/ и Евпраксия прехвальная,/ в пречистии души своя приявший/ дух кротости и разума Божественнаго,/ дух совета и велией крепости,/ имже благочестию и любви научаете/ всех смиренно притекающих к вам// и празднующих всечестную память вашу.

Преподобная матери Иулиания,/ инокинь преславная наставнице,/ земли Московския

первая игумения / богомудрая явилася еси. /
Ныне же вкупе с преподобней Евпраксией / в
Горняя со Ангелы вселилися есте, / молитве
Христа Бога нашего / оставление грехов нам
даровати // чтущим любовь память вашу.

К подвигом монашеским приведшая / мнозии
боголюбезныя жены, / образ послушания и
кротости / и любви Божественной явила еси, /
преподобная мати Евпраксия, / дивная голубица
непорочная. / Ныне же со возлюбленной
наставницей / преблаженной Иулианией //
молите Бога спастися душам нашим.

Ублажают ныне верных множества / память
вашу всечестную, преподобнии, / и веселия и
радости духовней / исполняются сердца
вопиющих: / О, предивнии заступницы, /
славнии молитвенницы к Богу, / да усердными
мольбами вашими / избавление примем
грехов // и спасение душам нашим.

Слава, глас 2:

Торжества пресветлаго день наста, / радостно
ликующе и песни вопиюще, / прославляем
Христа Бога нашего, / Дивнаго во святых
своих, / явившаго / земле Российстей /
прехвальных и Богоносных жен / преподобных
Иулианию и Евпраксию. / Ныне же к ним
радостно возопиим: / О, преславнии
угодницы, // молитве спастися душам нашим.

И ныне, Богородичен:

Прейде сень законная, / благодати пришедши: /
якоже бо купина не сгараше, опаляема, / тако
Дева родила еси / и Дева пребыла еси. / Вместо
столпа огненнаго / праведное возсия Солнце, /
вместо Моисея - // Христос, спасение душ
наших.

Вход. Прокимен дне. Чтения 3.

На литии стихира храма. И стихира, глас 1.

Подобен: Небесных чинов:

Ангельския силы Небесныя / ныне вам
сликовствуют / преподобнии наставницы наши
Богомудрии, / Иулиания и Евпраксия
прехвальныя. / Прославляя светлую память
вашу, / во умилении вопием днесь: // Радуйтесь,
обители райския наследовавшии.

Слава, глас 8:

Празднуют вся людие православнии / память
вашу, жены преподобнии, / темже любовь и
верою поим Христу, / даровавшему велие
множество чудес / по молитвам вашим,
преблажении, // Емуже возопиим: Господи,
слава Тебе.

И ныне, Богородичен:

Безневестная Дево, / яже Бога неизреченно
заченши плотию, / Мати Бога Вышняго, / Твоих
[рабов] мольбы прими, Всенепорочная, / всем

подаючи очищение прегрешений,/ ныне наша
моления приемлюще,/ моли спастися всем нам.

На стиховне стихиры, глас 2.

Подобен: Егда от древа:

Красоты мира суетнаго пренебрегшии,/ на
тесный путь стопы своя направивше,/
преподобнии Иулиания и Евпраксия,/ в постех
и плаче житие претрудное/ яко древнии
подвижницы проведшии,/ темже ныне
утешения от Господа/ и непрестаннаго веселия
сподобляясь,/ радуйтесь, претеплии
предстательницы// и молитвенницы о душах
наших.

Стих: Дивен Бог во святых Своих,/ Бог
Израилев.

Присно взирая на Небесную славу,/
воздержанием распясте плоти ваша,/ лествицу
желания обретшии,/ еюже взыдоша во обители
Горняя,/ в нихже ныне со святыми веселясь,/
не оставите и нас в молитвах ко Господу,/
почитающих пресветлую память вашу,/
радуйтесь, жены преподобнии,// православным
людям заступление.

Стих: Честна пред Господем/ смерть
преподобных Его.

Взыскати потрудились еста Христа Бога/ верою
и любовью от всея души,/ всеблаженнии

Иулиания и Евпраксия, / прославляя пресвятую
Троицу / Пресущественную и
Пребожественную. / Ейже ныне предстоя в
веселии / со святыми Ангельскими лики, /
радуйтесь, инокинь наставницы / и
молитвенницы о душах наших.

Слава, глас 6:

Боголюбивых жен восхвалим преподобных, /
многотрудныя подвиги понесших, / кротости
рачителей, смирения учителей, / благочестия
подражателей, / иноческаго жития
насадителей, / преподобных Иулианию и
Евпраксию. / Вами бо, Богозванные девы, /
сырые утешаются и недужные исцеляются, // и
земля Российская славится.

И ныне, Богородичен:

Творец и Избавитель мой, Пречистая, / Христос
Господь, из Твоих ложесн прошел, / в мя
оболкийся, / первыя клятвы Адама свободы. /
Темже Ти, Всечистая, / яко Божией Матери же и
Деве, / воистину вопием немолчно: / радуйся
ангельски, радуйся, Владычице, /
предстательство и покрове / и спасение душ
наших.

Тропарь, глас 1

Христу Жениху уневеститесь возжелавшыя / и
подвиги иноческия Того ради понесшыя, /
добродетельным житием и любовью ко всем /

себе украсившыя, преподобныя Иулиание и Евпраксиие./ Во граде Москве первыя обители девическия/ устроительницы явистесья/ и трудов и подвигов брата вашего святителя Алексия/ ревнительницы показастесья./ Сего ради, ныне на Небесех вкупе с ним торжествующе,/ молитесь граду Москве в Православии утвердиться,/ обители вашей сохранитесья// и спаситесь душам нашим.

НА УТРЕНИ

На Бог Господь: тропарь тойже, дважды, Слава, и ныне, Богородичен.

По 1-м стихословии седален, глас 8:

Яко заря Божественнаго сияния просветишася, преподобнии Иулиания и Евпраксия, оставивше вся жития мирскаго суетная попечения, и возложит всю надежду на Бога Вышняго, житие невещественно восприяша со безплотными Ангелы. Темже взываем к вам: молитесь Господа спаситесь душам нашим.

Слава, и ныне, Богородичен:

Буди нам покров и заступление, Премилостивая Владычице наша Богородице, яко Ты еси сила неборимая, всем немощным и безнадежным твердое упование.

По 2-м стихословии седален, глас 2:

Вси вернии, собравшесе ныне, возрадуемса
празднеству великому, памяти преподобной
Иулиании и сестры ея Евпраксии возлюбленной.
Восхваляем Господа, прославльшаго вас и
дарующаго утешение душам и велию милость.

Слава, и ныне, Богородичен:

Бога от Тебе воплотившагося познахом,
Пречистая Дево, едина Благословенная, едину
имамы Тя Богородицу, темже благодаряще
вопием Ти: Радуйся, Благодатная, Господь с
Тобою.

Величание

Ублажаем вас, преподобнии Иулиание и
Евпраксии, и чтим святую память вашу,
наставницы монахов и собеседницы Ангелов.

По полиелеи седален, глас 1:

Преподобнии Иулиания и Евпраксия /, другини
Христовы кротости и зеркало целомудрия, /
милости от Бога просящим раздаятельница, /
православныя веры истинныя хранительницы, /
болезни душевныя и телесныя исцеляющии, / тех
молитвами, Господи, излей на нас Твою велию
милость.

Слава, и ныне, Богородичен:

Избавление от бед Ты еси, Пречистая
Богородице, Тобою к нам сшел еси Христос Бог

наш, Егоже непрестанно моли помилovati и спасти души наши.

Степенна, 1-й антифон 4-го гласа.

Прокимен: Дивен Бог во святых Своих, / Бог Израилев.

Стих: В церквах благословите Бога, / Господа от источник Израилевых.

Всякое дыхание: **Евангелие от Матфея, зачало 104.**

По 50-м псалме стихира, глас 6:

Благоухание песней духовных / приносяще и вопиюще вам: / угодницы Христовы Иулиания и Евпраксия, / Христа Бога возлюбившии, / молитесь к Нему преусердно, / да Царствия Его будем наследницы.

КАНОН, глас 8.

Песнь 1

Ирмос: Колесницегонителя фараона погрузи, чудотворяй иногда Моисейский жезл, крестообразно поразив, и разделив море: Израиля же беглеца, пешеходца спасе, песнь Богу воспевающа.

Сподобите воспети постнические ваша подвиги и преславныя чудеса, имиже прославляется Господь наш Иисус Христос, возсиявый яко Солнце пресветлое в душах ваших.

Возлюбившии от юности всемилостиваго Бога, зане оставили вся утехи земныя и прилепишася к Нему всею душею своею, желая токмо иноческаго жития, и непрестанною молитвою и чтением Божественных Писаний умилением стяжали сердца.

Положили бо вы в сердце своем устройте обитель девичию во славном граде Москве для спасения многих душ православных. И услыша Господь пламенные молитвы ваша и дарова преславный монастырь всем ищущим спасения.

Христа Бога невесты возлюбленнии, смиренномудрием и кротостию от Него украшеннии, молитесь, да дарует нам Господь оставление прегрешений заступления вашего ради.

Богородичен: Тебе, Премилостивая Владычице, усердно молимся и всю надежду возлагаем на Твое милосердие. Спаси от всякия скорби и нужды вся веси и грады страны Российския.

Песнь 3

Ирмос: Утверждаей в начале небеса разумом, и землю на водах основавый, на камени мя, Христе, заповедей Твоих утверди, яко несть свят паче Тебе, Едине Человеколюбче.

Мнозии знатнии женихи желаша имати вас невесты себе красоты и доброты вашей ради. Но

вы уневестилися Единому Жениху Небесному, с
Нимже ныне обрели вечную радость и веселие.

Велиим воздержанием плотские страсти
умертвившии, древних пустынножительных жен
преемницы явились есте, с нимиже ныне
сликовствуете вкупе с Небесными Ангелы во
обителях райских.

Яко жены-мироносицы некогда служили Христу
и учеником Его, тако и вы, блаженнии, обрели
наставника себе в брате своем по плоти
Святителе Алексии, с нимже ныне возносите
теплые молитвы за землю Русскую.

Две свечи горящие на свещнице Российстей
постави вас Господь, дабы сияли вы миру
многообразными исцелениями и чудесы,
прославляя Христа Бога нашего, Егоже молите.,
да исцелит от мрака греховнаго очеса наша.

Богородичен: Тебе, Пречистая Владычице, честь
и поклонение приносим, якоже узрят небеса
дела перст Бога нашего, Емуже слава в Троице
Единому во веки.

Седален, глас 4

Лик собравшии богопокорливых жен/
последующих вашему преизрядному житию,/
возжелавших Ангельскаго образа/ и иночески
жительствующим в славном граде Москве,/
темже вам радостно вопием:/ не оставьте нас,

недостойных чад своих, / всеблаженную память вашу празднующих.

Слава, и ныне, Богородицен:

Спаси нас, Пречистая Богородице, многими бо обремененных грехми и страстьми лютыми, да тобою избавимся от всякия нечистоты, Ты бо едина Всечистая.

Песнь 4

Ирмос: Ты моя крепость Господи, Ты моя и сила, Ты мой Бог, Ты мое радование, не оставль недра Отча, и нашу нищету посетив. Тем с пророком Аввакумом зову Ти: силе Твоей слава, Человеколюбче.

Отвергосте вся блага мира сего и многоискусныя утехи земная, обретосте вы Небесных благ сладость превечную. Ныне радуетесь со Ангелы в чертогах Царя Небеснаго, прославляя Его неизреченную милость.

Прияша бо светильники своя и изыдоша в сретение Жениху Христу, преподобнии, елеем Духа Святаго исполняете души непорочнии свои, славя Господа сил в претрудном житии вашем.

Не дали сна очима своим, ни дремания веждам, но во всех стяжаша мудрость Божественную, благодаряще и призывающе всемогущаго Бога.

Украшиша светильники своя добродетельми многими, девы премудрыя показастеся, и чистотою сердечною возлюбили Христа Бога, сладчайшаго всех Жениха.

Богородичен: Дево, Мати Пречистая, подаждь нам прощение множества прегрешений и исполни умиления Божественнаго души наша, молим Тя.

Песнь 5

Ирмос: Вскую мя отринул еси от лица Твоего, Свете незаходимый, и покрыла мя есть чуждая тьма окаяннаго; но обрати мя и к свету заповедей Твоих пути моя направи, молюся.

Святым житием украшеннии, удалившися славы земныя, возлюбили вы слезы умиленнаго покаяния и воздержание предивное, такожде обрели славу Превечнаго Бога и радость неизреченную.

Яко кадило благоухающее приятны быша молитвы ваша, преблаженнии, имиже облагухаете вся приходящая к вам верою и любовью и на путь спасения наставляете.

Православныя веры твердыя хранительницы явились есте в лютую годину нашествия варварскаго, сирым и убогим прибежище даруя, страждущим и немощным утешение и заступление.

Сокровище драгоценнейшее евангельскаго

купца, яко жемчужину предивной красоты
воздвигли и возлюбили обитель вашу,
преподобнии, о нейже попечение имуще велие
присно.

Богородичен: Всех Творец из Тебе явися,
Пречистая Владычице, избавивший нас от зол
велиих, и возлюбивший нас безмерною Своею
милостию.

Песнь 6

Ирмос: Очисти мя Спасе, многа бо беззакония
моя, и из глубины зол возведи, молюся: к Тебе бо
возопих, и услыши мя, Боже спасения моего.

Иже на добрей земли возрастили плод в
терпении, благим и добрым сердцем сеючи
слово Божие. Не прельсти вас лукавый
богатством и сластями житейскими, но в
терпении стяжали души ваша.

Устроив обитель для инокинь в сердце страны
Российстей, прославили ея многими чудесы и
исцелении, такожде и ныне возводите в сердцах
верных обители Духа Всесвятаго, наставницы
премудрии.

Огнь Божественной любви возгорется в ваших
пречистых душах, о, молитвенницы чуднии, и
пламень неопалимый ревности духовней объят
вы, имже возжигаются души притекающих с
верою и любовью к заступлению вашему.

Яко купина неопалимая, любовь ваша нестгораемая ко Господу нашему Иисусу Христу и всякому творению Его Премудрости, сего ради Господь воздвиже храм Пречистыя Богородицы в честь образа Ея "Неопалимая Купина" на месте погребения вашего.

Богородичен: Купина Неопалимая явилася еси, о, Пречистая Богородице, укрепи веру нашу Православную и спаси страну Российскую и сотвори ея неопалиму от всякаго зла.

Кондак, глас 2:

Что вас наречем, богомудрыя Иулиание и Евпраксиие?/ Немощный сосуд естеством,/ но подвиги и труды мужески понесосте;/ преподобныя жены,/ но славы отцев воистину сподобистесь;/ от земных рода благаго,/ но Небеснаго отечества достигосте.// Молите усердно Владыку Христа спастися душам нашим.

Икос:

Христову Церковь возвеличивший житием вашим, преподобнии Иулиания и Евпраксия, дивнии наставницы черницом в подвизах иноческих и утешительницы всех притекающих к вам, жены богомудрии. Ныне вкупе со всеми верными восхваляем ваше иноческое житие, просиявшее миру благодатию добродетелей.

Песнь 7

Ирмос: Божия снизхождения огонь устыдеса в Вавилоне иногда, сего ради отроцы в печи радованною ногою, яко во цветнице ликующе, пояху: благословен еси Боже отец наших.

Всем приходящим к вам были яко матери и сестры любезныя: алчущих напитавшии, жаждущих напоившии, душевную скорбь и тесноту ижденувшии и помазующие елеем радования.

Видя Господь наш Иисус Христос веру вашу и усердие преизрядное дарова множество чудес молитв ради ваших, преблаженнии Иулиания и Евпраксия, имиже доньне прославляется славная обитель Зачатиевская.

Общему житию женскому на Руси начальница бывши, премудрая мати наша Иулиания, собраша мнозии черницы во обитель свою, и с сестрою своею Евпраксией присно молитесь о душах наших.

Благими делами прославляется имя твое, преблаженная Евпраксия, яко милостивая мати явилася еси всем имущим нужду и алчбу, тако во всем была для них помощь и отрада, кормительница и утешительница.

Богородичен: Помилуй мя, Владычице, Мати Бога нашего Иисуса Христа, яко немощен есмь и многими страстьми обуреваема есть душа моя

окаянная, но молитвами Твоими да спасет ю
Сын Твой от всякия беды и напасти.

Песнь 8

Ирмос: Седмерицею пещь халдейский мучитель
богочестивым неистовно разже, силою же
лучшею спасены сия видево, Творцу и
Избавителю вопияше: отроцы благословите,
священницы воспойте, людие превозносите во
вся веки.

Обрели веселие вечное и радость неизреченную
прехвальнии наставницы жен боголюбивых,
молитвами сугубую благодать восприяли есте,
еюже добре послужили Христу Богу и Церкви
Его святей.

Зело богобоязлива бывши, преподобная
Иулиания, научала ближния своя благоговению
и Страху Божию, без него никтоже спастися
может, но всяк ему научен обрящет премудрость
и любовь Божию.

Приидоша в пустыню сердца своего и тамо
едина с Богом безмолвствуя, имела еси ты
собеседники себе Ангелы Небесныя,
преподобная мати Евпраксия, ныне с ними
воспеваеи славу Премилостивому Господу вкупе
с сестрой твоей премудрой Иулианией.

Лепота бо Церковная показалася еси обитель
ваша, преподобнии, переходит от земли к

Небесным, указуя путь ко спасению всем притекающим к вам в молитвах, и научая славословити: Господа пойте и превозносите во веки.

Богородичен: Ты родила еси Превечнаго Бога, о Пресвятая Мати Дево, спаси нас от всякия напасти возносящих славу и благодарение Сыну Твоему, Егоже поем и превозносим во веки.

Песнь 9

Ирмос: Ужасеся о сем небо, и земли удивишася концы, яко Бог явися человеком плотски, и чрево Твое бысть пространнейшее небес. Тем Тя Богородицу, Ангелов и человек чиноначалия величают.

На пажить чисту воздержания пресладкаго и ко источнику прохладному безстрастия иноческаго приводили вы есте, о премудрии левы, агниц своих непорочных, соблюдая их от волка коварнаго.

Две горлицы прекрасныя, две голубицы Небесныя, стоящии пред Богом земли, и принесшии в жертву живую и непорочную души пречистыя ваша Иисусу Христу Господу нашему, Емуже ныне со всеми святыми поете славу во веки.

День празднственный днесь созывает монахов в лик духовный собиратися и воспевати песнь

победную и славу Господу вопиюще: несть раб и несть свободь, несть мужеск пол, ни женский, но вся и во всех Христос.

Светися, светися, обитель преславная Зачатиевская, в тебе бо две благовонныя отрасли насади Господь, из нихже древо бысть пространное и благоухающее, на всю Россию православную аромат свой духовно изливающее.

Богородичен: Очисти нас от скверны сердечныя, Пресвятая Матерь Господа, и украси души наша умилением и избави муки вечныя.

Светилен

О, презревшии вся плотская мудрования, стяжавшии подвиги и сотворшии чудеса мнози, вашу пресветлую память ныне празднуют вся людие православныя, умиленно вопия вам: молитесь непрестанно о всех нас, Иулиания и Евпраксия досточуднии.

Слава, и ныне, Богородичен:

Исповедуем Тя, Владычице Богородице, Тобою бо обретшии спасение, ибо родила еси Бога неизреченно, даровавшаго нам многих угодников Своих и молитвенников о душах наших.

На хвалитех стихиры, глас 2:

В добродегелех измлада прилежно
подвизавшиися, / преподобнии Иулиания и
Евпраксия, / добре иноческаго жития
возжелаша, / к подвигам поста и бдения
устремишася, / темже обогати вас Бог даром
исцеления, / и множества чудес показа молитв
ради ваших. // Емуже возопием: Господи слава
Тебе.

Возсия неизреченный свет яко светило красное /
чудесы ваша, девы преподобнии, / и радостию и
веселием озарилися сердца. / Ныне празднует
Церковь Русская / всечестную память Иулиании
и Евпраксии, / преподобных и богоносных
матерей // и молитвенниц о душах наших.

Преподобнии жены земли Российстей, /
Иулиания и Евпраксия богопослушливии, / в
Царские Чертоги Господа вшедшии / и собою
Церковь Русскую украсившии / велиими своими
.добротами / молитесь спаситися нам.

Слава, глас 8:

В песнех воспоим славу Христу Богу, /
даровавшему нам святых угодниц Своих, /
преподобных Иулианию и Евпраксию, /
усердных молитвенниц страны Российския. / О
наставницы смиреннии, / ангельски поживши
на земли, / ныне обрели радость вечную, / темже,
Богомудрии, вас ублажаем.

И ныне, Богородичен:
Владычице, прими молитвы раб Твоих и
избави нас от всякия нужды и печали.

Славословие великое. Отпуст.

На литургии
служба преподобническая.

